

Partido Politico Accion 21  
Attn. Directiva (Bestuur)  
LG Smith Blvd. 120  
Oranjestad, Aruba

5 juli, 2021

Topico: Retiro

Apreciable miembronan di directiva,

Mi ta dirigi mi mes na boso cu varios preocupacion.

### **POSIBEL SUSPENCION**

Mi a wordo invita pa un gesprek cu directiva dia 1 di juli 2021 cu topico "posibel suspension di partido Accion21". Segun e invitacion cu mi a ricibi, un miembro di directiva lo a entrega un mocion pa pidi mi suspension. Directiva lo a invitami pa asina scucha mi banda prome cu bai over na considera aproba e mocion di suspension.

Durante e reunion aki Sr. Miguel Mansur, como presidente di directiva, lo a presenta un carta cu 12 punto pa cual e lo ta sinti cu lo mi mester wordo suspendi. Lamentablemente tur 12 punto no tawata basa riba puntonan cu segun statuut ta motibo valido pa un suspension, es mas, nan tawata mas bien trivialidad basa riba redo, suposicion y opinion sin por presenta niun prueba pa sostene tur e ponencianan treci dilanti. Mi a contesta cada un di e ponencianan hasi, y es mas a keda hopi sorprendi mirando cu hopi di e ponencianan ta data hasta prome cu eleccion. Mi a hasi e pregunta dicon nunca, y sigur prome cu eleccion, no a trece e ponencianan aki dilanti si en berdad nan tawata causa frustracion personal serca Sr Mansur. Particularmente mi a puntra dicon a warda te despues di eleccion y ora cu e resultado individual a keda publica cu a cataloga e ponencianan emocional aki como supuesto "desconfiansa y disgusto" y usa esakinan como base pa pidi mi suspension di partido.

Durante e reunion mi persona tambe a trese varios punto dilanti, pero di mi banda semper a muestra e disponibilidad pa yega na un solucion y reconciliacion.

Na final di e reunion a palabra cu e otro miembronan di directiva nan lo papia cu Sr. Mansur y cu nan lo tuma contacto cu mi persona den un paar di dia pa asina purba yega na un solucion lo mas antes posible y cu lo por hiba na un reconciliacion na bienestar general di e partido, pero tambe pa esnan cu a deposita nan confiansa den partido y nos persona.

Un di e palabracionan tawata cu lo no haso niun entrevista cu prensa te ora cu yega na un solucion.

Ta lamenta cu no a cumpli cu e palabracion hasi, y cu toch Sr. Mansur a opta pa duna un entrevista diabierna 2 di juli 2021 na Noticia Impacto sin cu directiva a tuma contacto bek cu mi persona

promer manera palabra, y cu directiva tampoco a cumpli cu e palabracion hasi unda cu lo tuma contacto cu mi persona pa yega na un solucion prome cu tuma cualkier otro paso.

Mi ta lamenta profundamente y refuta tur e acusacionan sin base contra mi persona durante e reunion cu miembronan di directiva, particularmente si mira cu como partido nobo nos mester hustamente duna e bon ehempel, sigur si mira artikkel 4 di e Statuut di partido cu ta splica e norma y balornan cu e partido ta para p'e, particularmente inciso 1e, unda cu ta menciona cu "lo lucha pa e libertad, dignidad y bienestar di cada individuo y unda lo reconoce y respeta e libertad di e derecho di pensamiento di cada persona".

## **PARTIJRAAD**

Adicionalmente mi a tuma nota cu dialuna dia 5 di juli 2021 pa 7:30pm a convoca un reunion di Partijraad den cual a menciona entre otro punto 9. "Onwerkbaar situatie"

Mi kier avisa directiva cu lo mi no ta presente na e reunion aki pa e siguiente motibonan:

Pa locual ta concerni e notulen cu a keda manda via email pa reunion di 28/6/21:

- Punto 2: no a añadi cu a menciona cu NO a hiba conversacion individual cu ni Leonardo Figaroa ni Daphne Lejuez ainda. Cu Daphne a indica cu tawata tin comunicacion via whatsapp cu Miguel Mansur den cual e lo a keda di avisa Daphne ki dia/ora lo topa. Aki Miguel lo a contesta cu lo mester a comunica cu Illana Hoffer, pero Daphne a contesta cu e tawata pendiente di Miguel, segun nan ultimo comunicacion via whatsapp. A palabra cu lo fiha un fecha y ora despues di e reunion.
- Punto 5: "nos di accion 21" con a yega na e conclusion aki? A ser oficialmente discuti of pasa y acepta un mocion pa sostene un gobierno mas amplio posible gabinete di Unidad Nacional? No ta aclarea unda e decision aki a keda aproba.
- Punto 5: A ser oficialmente discuti of pasa y acepta un mocion pa bin cu un Zakenkabinet? No ta aclarea unda e decision aki a keda aproba.
- Punto 5: Pesey "partijraad a dicidi"? Con a yega na e conclusion aki? A ser oficialmente discuti of pasa y acepta un mocion pa cu nos no lo forma parti di un gobierno cu tin menos di 13 asiento?
- Pa loke ta partijraad, bestuur y tur reunion hiba prome cu eleccion, e unico personanan segun Statuut di Accion21 cu ta miembro di Accion21 oficialmente ta Sr. Miguel Mansur y Sr. John Chemaly. A ser hiba un reunion cu notulen den cual a nombra Sra Ghislaine Hart como parti di directiva? Si esaki ta caso lo ta bon pa comparti esaki cu Partijraad.

Adicionalmente pa locual ta e Statuut di Accion21 y su funcionamiento mi tin e siguiente puntonan di preocupacion:

- Segun artikkel 8, inciso 1 di Statuut pa por bira miembro di Accion21, e persona mester expresa su deseo por escrito na bestuur cu kier bira miembro di Accion21.
- Segun artikkel 8, inciso 2, e persona cu e expresa su interes pa bira miembro por unicamente wordo acepta di e haña un confirmacion por escrito di directiva cu e la keda acepta como miembro.

- Segun artikkel 8, inciso 4, directiva mester otorga tur miembro un comprobante di nan miembrecia firma pa e secretario di directiva.
- Pa loke ta trata e composicion di e directiva, segun artikkel 12, inciso 12 di Statuut, desde e fecha cu Sr Miguel Mansur a pone su mes elegibel riba lista como “volksvertegenwoordiger” y a entrega e lista oficialmente na Electorale Raad dia 7 di mei 2021, e no por forma parti mas di e directiva y mester retira inmediatamente.
- Segun artikkel 12, inciso 2, na momento cu e directiva ta consisti di menos cu 3 miembro, e mester yena e vacatura den menos cu 2 luna.
- Segun artikkel 12, inciso 3, escohencia di miembro di directiva ta bai mediante un proposicion hasi. E proposicion mester keda hasi pa directiva y minimo 5 miembro di partido y mester keda entrega 7 dia prome na e directiva prome cu e reunion den cual e miembrecia di directiva ta keda trata. Kandidatonan pa directiva mester proclama por escrito di ta dispuesto pa acepta e posicion y inclui esaki cu e proposicion na directiva.
- Mirando cu Sr. Mansur automaticamente no por tawata miembro di directiva mas desde 7 di mei 2021, esaki ta trece cu e directiva oficialmente ta operando cu unicamente 2 miembro desde e fecha aki. Den cuadro di busca un miembro di directiva segun Statuut, e proposicion pa un candidato pa miembro di directiva mester keda entrega 7 dia prome cu directiva tuma decision riba e miembrecia. Tur esaki mester tuma luga den un periodo dentro di 2 luna for di 7 di mei 2021 ora cu Sr. Mansur a postula y oficialmente no ta forma parti mas di directiva. Esaki ta nifica cu prome cu e fecha di 7 di juli 2021 e puesto mester a keda yena.
- Awe nos ta 5 di juli 2021 y ta surgi e pregunta si a notifica Partijraad di e vacatura na tempo pa por cumpli cu e requisito di 7 dia pa proposiciona candidato pa directiva prome cu tuma decision tocante e miembrecia. Mirando cu dia 7 di juli 2021, teniendo cuenta cu e procedura stipula di proposicion di candidato pa directiva den statuut, e directiva lo no conta cu tres (3) miembro of mas, pues e directiva lo no ta autorisa desde 7 di juli 2021 pa opera te cu ora esaki keda resolvi.

Awor mirando tur esaki por conclui cu TUR reunion prome cu eleccion no tawata tin realmente miembro nobo (aproba) presente y consecuentemente contribucion, mocion y decisionan tuma como partijraad no tawata tin valides - paso pa ta miembro di partido of partijraad bo mester sea manda bo deseo por escrito pa join e partido y wordo aproba por escrito pa directiva - of bo mester ta un candidato cu a participa na un eleccion di e partido pa por forma parti di e partijraad automaticamente. Te asina lew cu mi por corda, e directiva nunca a comunica ni aproba mi miembrecia por escrito, ni ofrece un comprobante di miembrecia firma pa secretario di directiva na mi persona.

### **DIRECTIVA (bestuur)**

Mi mes nunca por a forma parti di directiva pa motibo cu mi tawata un Parlamentario den funcion (artikkel 12, inciso 12), pero den tur confiansa, y mirando e tempo cortico prome cu eleccion, mi a confia ora mi a afilia mi mes na Accion21 cu esaki lo tawata un organisacion profesional cu ta tene su mes na regla y Statuut. Pero, no ta te cu awor, cu mi a wordo presenta cu un posibel suspencion segun Statuut, cu mi a bai lesa e Statuut cu mas profundidad y constata varios fayto.

Dus mirando cu niun prospecto candidato tawata miembro (cu excepcion di Sr Mansur y Sr. Chemaly cu ta miembro di directiva conforme slot di Statuut) segun Statuut (artikel 8 lid 1, 2 y 4), prome cu eleccion, esaki ta nifica cu tur supuesto reunion y palabracion hasi y/of decision tuma pa "Partijraad" prome cu eleccion ta invalido mirando cu niun di e candidatonan (cu excepcion di Sr. Mansur) oficialmente tawata miembro te cu despues di eleccion. Pues tur punto di agenda pa e Partijraad di 5 di juli 2021, cu ta referi na decisionan anteriormente tuma pa Partijraad y tur previo mocion presenta pa supuesto miembronan ta invalido. Adicionalmente esaki tambe ta trese duda den e aprobacion duna na e programa di partido pa partijraad prome cu eleccion (artikel 22), como tambe tur otro decision cu a keda tuma na un forma empugna cu Statuut.

Dus realmente e prome reunion despues di eleccion (28 di juni 2021) por a ser considera como e prome partijraad oficial, mirando cu apenas na e momento aki tur candidato cu a forma parti di e eleccion ta wordo automaticamente considera miembro di partijraad segun Statuut artikel 11, inciso 2c.

## **CONCLUSION**

Mirando cu for di un principio mi a para 100% banda di Sr. Mansur y a asistie cu tur e conocimiento cu mi a obtene te cu awor den loke ta posibel den coneccion cu politica di Aruba (cu te ainda ta algo ful nobo pa Sr Mansur), cual ta experiencia cu mi a haña durante mi periodo den politica, mi ta sumamente decepciona cu tur e sucedido y e ansha y insistencia di Sr. Mansur pa retira mi persona di e partido sin un base veridico segun Statuut.

Adicionalmente mirando e falta di organisacion profesional di e partido unda cu a opera sin cu directiva a atene su mes na e Statuut, ta causa cu mi a perde confiansa den e partido y particularmente Sr. Mansur. Awe mi ta tuma e decision di retira for di e partido mirando (1) e "onwerkbaar situatie" cu a keda ocasiona pa Sr Mansur, particularmente mirando cu di su banda no tin espacio ni pa deliberacion, dialogo of reconciliacion y (2) tambe e hecho cu directiva no a adheri na Statuut cu tur consecuencia ya menciona.

## **RETIRO**

Pa medio di e comunicacion por escrito aki mi ta notifica directiva cu mi ta tuma mi retiro di e partido cu efecto inmediato. Proximamente lo laga un persona pasa busca mi pertenencianan cu ainda por ta na cede di partido.

Mi ta lamenta profundamente cu mester a yega na esaki, sigur si mira cu mi semper a duna di mi banda desde e momento cu mi a afilia mi mes na e partido. Mas aun mi ta lamenta e hecho cu Sr. Mansur no a atende su inkietudnan cu mi persona prome cu eleccion, pero a opta pa hasi esaki despues di eleccion, y di e forma aki kier si hasi uso di e sosten cu mi persona a ricibi mediante e partido pa tambe por a contribui na e asiento cu a keda alcanza hunto cu e otro candidatonan riba e lista.

Mientras mi lo no keda forma parti di Accion21, mi no ta distancia mi mes di e resultado electoral y lo keda semper disponibel pa representa mi Pais den caso cu e oportunidad presenta, sigur

mirando cu tin 500 persona cu e deposita nan confiansa den mi persona, cu ta mas di un redoblacion di mi resultado na 2017. Mi a participa den eleccion cu Accion21, pasobra mi a comparti e idealnan di e partido, pero prome cu tur cos pa ami semper e interes general di mi isla y su hendenan mester wordo poni na prome lugar.

Mi kier a termina agradiciendo e directiva pa su tempo y desea e partido hopi sabiduria den e temporada turbulento nos dilanti.

Atentamente,

A handwritten signature in blue ink, consisting of several overlapping loops and a vertical line, positioned above the name 'Daphne Lejuez'.

Daphne Lejuez

CC Partijraad